

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

1. लेफ्टिनेंट गवर्नर मनोज सिन्हा होरें गाज़ीपुर साहित्यिक उत्सव दे दरान राष्ट्र दी तरक्की च साहित्य ते विचारकें दी भूमिका पर लोऽ पाई।
2. उपमुख्यमंत्री सुरिंदर चौधरी होरें तवी नदी पर बने दे चौथे पुल दी मरम्मती ते इसी परतिये बहाल करने दे कम्मै दा जायजा लैता। उ'नें इस पुल दे कम्मै गी तय समें अंदर सबूरा करने दे निर्देश जारी कीते।
3. नगरोटा ते बडगाम असैम्बली हलकें लेई उप-चुनां गितै प्रचार अज्ज संझां मुक्की जाहग। इ'नें सीटें लेई मतदान अत्तरु मंगलवारें 11 नवम्बर गी होग।
4. जम्मू-कश्मीर राज्य जांच एजेंसी - एसआईए ने नार्को-आतंकवाद आहले गिरोह दे सरगना गी गिरफ्तार कीता ऐ जेहदे सरबन्ध पाकिस्तान च बैठे दे आतंकवादिएं कन्नै दस्से जा'रदे न।
5. तंदरूस्ती ते नशा-मुक्त भारत दे स्नेह गी बढ़ावा देने दे मकसद कन्नै सीमा सुरक्षा बल ने अज्ज जम्मू च पैहली-पैहली जम्मू बीएसएफ मैराथन 2025 दा आयोजन कीता ऐ।

<><><><><><>

उपराज्यपाल मनोज सिन्हा होरें भारत डायलाग्स आसेआ आयोजित गाजीपुर साहित्य महोत्सव च मुख् भाषण दिता। भारत ते विदेशें च रवा करदे लखारियें, बचारकें ते विद्वानें गी संबोधित करदे होई श्री सिन्हा होरें समाजी एकता गी मजबूत करने आस्तै बरोबरी, न्याऽ ते आपसी भाईचारे गी बढ़ावा देने च उंदी महत्वै आहली भूमिका पर बल पाया। तरक्की गी रफ्तार देने च साहित्य दी ताकत पर लौह पांदे होई उनें आखेआ जे समाज गी ज्ञान ते आलोचनात्मक सोच रायं आले इक बगदे दरेआ आहला लेखा गतिशील रहना लोड़चदा। एल.जी होरें नागरिकें गी ज्ञान गी सांभियै रखने, नमियें काहडें गी बढ़ावा देने, नौजवानें गी बाइखितयार बनाने ते 'एक भारत श्रेष्ठ भारत' दी भावना गी बढ़ावा देने सने 10 संकल्पें पर ध्यान देने दी अपील कीती।

<><><><><><>

Dy. CM 4th Bridge

उपमुखमन्त्री सुरेंद्र चौधरी होरें भगवती नगर स्थित चौथे तवी पुल दा कल रातीं दौरा लाइयै उत्थै चलाक रदे कम्मै दा जायजा लैता। दौरे दरान उनें कम्मै दी रफ्तार पर चैता प्रगट कीती। उपमुखमन्त्री होरें अफसरें गी निर्देश जारी करदे होई आखेआ जे ओह कम्मै दी रफ्तार गी बदान तां जे परियोजनां गी तय समें-सीमा ते अंदर-अंदर तोड़ चाढ़ेआ जाई सकै। उनें कम्मै च म्यार ते सुरक्षा मानकें पर टकोहदा ध्यान देने लेई आखेआ। इस बरै अगसत म्हीने आए दे हाडें मगरा इलाके दे मुख् राबिता मार्ग चौथे पुल गी पुज्जे दे नुकसान दी मरम्मत कीती जा करदी ऐ।

<><><><><><>

नगरोटा ते बडगाम असैम्बली हलकें लेई होने आहले उप-चुनांs लेई हुन छड़े द'उं गै दिन बाकी रेई गे न। इ'नें सीटें लेई चुनांs प्रचार अज्ज मुक्की जाहग। चुनां आयोग दे दिशा-निर्देशें मूजब, तय समें दे बाद इ'नें दौनें असैम्बली हलकें च कुसै किस्मै दे चुनांs प्रचार दी खुल्ल नेई दिती जाहग। इस गैह दा मकसद नगरोटा ते बडगाम हलकें च होने आहले उप-चुनाएं गी बवस्थित ते पारदर्शी ढंग्गै कन्नै करोआना जकीनी बनाना ऐ। केइएं हफ्तें दी सियासी गतिविधिएं दे बाद, राजनीतिक दल हुन अपना पूरा ध्यान औंदी 11 नवम्बर गी होने आहले मतदान बक्खी केन्द्रित करडन। वोटें दी गिनतरी 14 नवम्बर गी कीती जाहग।

<><><><><><>

CS-Udhampur

मुख्य सचिव अटल डुल्लु होरें कल उधमपुर जिले दा व्यापक दौरा लाइयै उत्थे जारी विकास परियोजनाएं ते बक्ख-बक्ख खेतरे च सरकार दिएं महत्वपूर्ण पैहलकदमिएं दा जायजा लैता। इस मौके पर उ'नें जिला प्रशासन गी निर्देश दिता जे ओह सिइक संपर्क दा दर्जा बधाने दे कन्नो-कन्नी डुडु-बसंतगढ़ इलाके च मोबाईल टॉवर बी स्थापित करै तांजे इस दूर-दरेडे इलाके तोहड़ी पुज्ज ते संपर्क सरिस्ते च सुधार कीता जाई सकै। मुख्य सचिव होरें सबनें सरबन्धत विभागें गी बी आखेआ जे ओह इस गल्लै गी जकीनी बनान जे सबनें योग्य लाभार्थिएं गी सरकार दिएं योजनाएं दे दायरे हेठ आहन्नेआ जा। शिक्षा खेतर दा जायजा लैंदे होई मुख्य सचिव होरें मुख्य शिक्षा अधिकारी होरें'गी निर्देश दिता जे ओह सबनें सरकारी स्कूलें च बच्चें लेई मय्यारी शिक्षा बवस्था जकीनी बनान।

<><><><><><>

Lavender-Cultivation

खूबसूरती गी नखारने ते खुशबू कन्नै सरबन्धत सैलसफा गी बदाने दे मकसद कन्नै भारती राश्ट्री राजमार्ग प्राधिकरण NHAI नै बनिहाल ते काजीगुंड बश्कार जम्मू-श्रीनगर राश्ट्री जरनैली शिड़क दे 16 किलोमीटर लम्में हिस्से पर लैवेंडर दी खेती रम्भ कीती ऐ। NHAI दे परियोजना निदेशक शुभम यादव होरें दस्सेआ जे इस पहल दा मकसद चौपासम मताबक थाहें गी खूबसूरत बनाने दे कन्नो-कन्नी कम्म रोजगार दे मौके उपलब्ध करोआना बी ऐ। उनें दस्सेआ जे राश्ट्री जरनैली शिड़के दे आहले-दोआले लैवेंडर दी खेती कन्नै ना शड़ा खूबसूरती ते खुशबू कन्नै सरबन्धत सैलसफा गी बढ़ावा थहोग, सगुआं मकामी करसानें गी बी लाह पुज्जोग।

<><><><><><>

SIA-Narco

राज्य जांच एजेंसी एस.आई.ए जम्मू-कश्मीर नै मुम्बई ब्हाई अड्डे थमां नशीले पदार्थ कन्नै सरबन्धत आतंकवाद माइयूल दे सरगना दी गिरफ्तारी कन्नै इक बड्डी कामयाबी हासल कीती ऐ। इक सोशल मीडिया पोस्ट च एस.आई.ए नै दस्सेआ जे पुंछ हवेली तहसील दे देगवार-तेरवान ग्रांठ दा बसनीक मोहम्मद अरशद दर्ज आसिफ जोड़ा 2023 थमां फरार ते साउदी अरब थमां अपनी गतिविधियां चला करदा हा, उसी हिरासतै च लैता गेआ ऐ। ओह नार्को टैरर माइयूल दा सरगना ते पाकिस्तान स्थित नशीले पदार्थ दा कारोबार करने आहले ते जम्मू-कश्मीर च नार्को टैरर गुर्गे बश्कार इक मुख कड़ी हा। एहदे शा पैहले ओहदे खलाफ इक्क लुक आउट सर्कुलर ते

गैर जमानती वारंट जारी कीते गेदे हे। औहदी गिरफ्तारा नशीले पदार्थे कन्नै सरबंधत आतंकवाद खलाफ एस.आई.ए दी बड्डी कामयाबी ऐ।

<><><><><><>

BSF-Marathon

अज्ज बड्डलै सरहदी मुख्यालय बीएसएफ जम्मू आसेआ आयोजित पैहली बीएसएफ मैराथन-2025 गी सीमा सुरक्षा बल दे महानिदेशक दलजीत सिंह चौधरी होरें पलौड़ा स्थित बीएसएफ परिसर थमां हरि झंडी दस्सियै रवाना कीता। मैराथन च चार वर्गे- 42 किलोमीटर, 21 किलोमीटर, 10 किलोमीटर ते 5 किलोमीटर दियां द्रौड़ां रक्खी गेदियां हियां जिंदे च जम्मू दे सरहदी इलाकें, गोआंडी राज्यें ते समूलचे भारत दे बक्ख-बक्ख हिस्सें थमां आए दे प्रतिभागियें हिस्सा लैता। मीडिया गी संबोधित करदे होई बीएसएफ दे महानिदेशक दलजीत सिंह चौधरी होरें आखेआ जे इस मैराथन दा मुख मकसद तंदरूस्ती दी भावना गी बदाना ते नशामुक्त राश्ट्र बनाना ऐ।

<><><><><><>

Kashmir-Marathon

श्रीनगर च आयोजित कश्मीर मैराथन दा दुआ संस्करण श्रीनगर च शानदार ढंग्गै कन्नै आयोजित कीता गेआ ते एहदे च 27एं राज्यें ते 11एं मुल्खें थमां प्रतिभागी हिस्सा लै करदे न। 3 जहार शा मते धावकें इस मैराथन च शिरकत कीती जिंदे च मन्ने-परमन्ने दे एथलीट बी शामिल हे। इस कार्यक्रम दे राहें आरोग्य, तंदरूस्ती ते सेहतमंद जीवन शैली दा संदेस देने दे

कन्नो-कन्नी खेड्डें ते रोमांचक आहले सैलसफा दे खेतरें च जम्मू-कश्मीर दी आलमी सतह
उप्पर बधदी साख पर बी लोs पाई गई। सैलसफा मैहकमे ने इस कार्यक्रम दे सबनें आयोजके
प्रति आभार जतांदे होई आखेआ ऐ जे उंदे जतनें दी बदौलत गै अंतर्राष्ट्री सतह दे इस कार्यक्रम
गी कामयाबी कन्नै करोआया जाई सकेआ ऐ।

<><><><><><>

Kashmir-Marathon

मकामी नौजोआनें गी मौके उपलब्ध करोआने दे मकसद कन्नै श्रम विभाग, जिला रोजगार ते
परामर्श केंद्र रामबन ते जम्मू-कश्मीर कौशल विकास निदेशालय दे सहयोग कन्नै बक्ख-बक्ख
कौशल विकास कार्जक्रमें ते रोजगार सरबन्धी स्कीमां रम्भ करा करदा ऐ। D.E.C.C. रामबन
रोजगार मेलें ते सिखलाई आहले कार्जक्रमें दा मुख केंद्र ऐ। मिशन युवा पहल तैहत नौजोआनें
गी अपना उद्दम रम्भ करने ताई कौशल सिखलाई, मार्गदर्शन ते माली मदाद उपलब्ध करोआई
जंदी ऐ। इस सरबन्धै च जानकारी दिंदे होई रामबन दे सहायक श्रम आयुक्त अमित कुमार होरें
दस्सेआ।

<><><><><><>